

# ÞJÓÐHÁTÍÐ

FIMMTUDAGUR 17. JÚLÍ 2014

## 140 ára



## Quarashi mætir í Herjólfssdalinn

Hljómsveitin Quarashi verður aðalnúmerið á Þjóðhátíð í ár en þetta verða einu tónleikar sveitarinnar á þessu ári. Nýtt lag frá sveitinni kom út í vor og annað er væntanlegt í lok sumars. Hljómsveitin starfaði á árunum 1996–2005 og naut mikilla vinsælda.

**H**ljómsveitin goðsagna-kennda Quarashi spilar á Þjóðhátíð í ár en sveitin hefur aldrei áður haldið tónleika í Vestmannaeyjum. Quarashi verður aðalatriðið á laugardagskvöldinu þar sem hún mun spila öll sín þekktustu lög á stóra sviðinu í Herjólfssdal. Sveitin starfaði á tímabilinu 1996-2005 og náði miklum vinsældum hérlendis auk þess sem hún vakti nokkra athygli erlendis, þá helst í Japan og Bandaríkjunum. Sölvi Blöndal, forsprakki hljómsveitarinnar, lofar frábærum tónleikum og mikilli upplifun fyrir þjóðhátíðargesti enda sé tónlist Quarashi stór og mikil og þurfi marga áhorfendur til að njóta sín. „Þetta verða einu tónleikar okkar í sumar og kannski þeir síðustu á ferlinum, hver veit. Ég hef aldrei komið til Vestmannaeyja og hlakka mikið til að spila í dalnum. Í sjálfu sér veit ég ekkert hvað ég er að fara út í en hef bara heyrt góða hluti um Þjóðhátíð og heimamenn.“ Allir fyrrverandi meginliðsmenn sveitarinnar verða með í Eyjum en auk Sölva eru það Höskuldur Ólafsson, Steinar Fjeldsted, Ómar „Swarez“ Hauksson og Egill „Tiny“ Thorarensen.

Flestir þjóðhátíðargestir eru ungt fólk sem var á leikskólaaldri þegar fyrsta plata sveitarinnar kom út. Sölvi segir það vera

skemmtilega upplifun að spila fyrir nýja aldurshópa sem þó þekki tónlist þeirra vel. „Ég uppgötvaði það fyrst fyrir alvöru á Bestu hátíðinni árið 2011 hvað við vorum að spila fyrir ungt fólk. Ég labbaði aðeins út fyrir og leit yfir áhorfendurna. Þetta voru allt um 16-20 ára krakkar sem voru varla fædd þegar fyrsta plata okkar kom út. Það var alveg frábær sjón.“

### NÝTT LAG Í HAUST

Quarashi gaf út nýtt lag í vor, Rock On, sem hefur fengið mikla spilun en tíu ár eru síðan sveitin sendi síðast frá sér nýtt lag. Sölvi segir hljómsveitina stefna á að senda annað lag frá sér í lok ágúst eða snemma í september. „Þótt Quarashi muni kannski aldrei spila frammar er þessi frumbörf alltaf til staðar, að semja tónlist. Hún er jú rótin að þessu öllu saman. Quarashi hefur alla tíð verið mér hugstæð. Ef ég er í stuði til að búa til tónlist geri ég það. Það þýðir þó ekki að ég geri það alla tíð. Ég er í miklu stuði þessa dagana en við verðum bara að sjá til hvernig málin þróast næstu árin.“

Ferill sveitarinnar var viðburðaríkur og margt stendur upp úr í minningunni að sögn Sölva. „Við fórum á einu ári úr því að spila fyrir tvo unglinga í félagsmiðstöð hér heima í að hita upp



Þrjú félagar Quarashi sem spila á Þjóðhátíð: Steinar Fjeldsted, Sölvi Blöndal og Egill „Tiny“ Thorarensen.

MYND/DANIEL

fyrir Eminem í Bandaríkjunum. Það sem stendur upp úr er að hafa fengið tækifæri til að taka þetta nánast alla leið. Við trúðum á okkur allan tíman og það er ótrú-

lega gaman að horfa til baka og rifja upp þetta tímabil. Við vorum til dæmis fyrsta íslenska hljómsveitin sem fyllti Laugardalshöll og einnig sú fyrsta sem gaf út lag á

MP3-formi sem var mikil nýjung á þeim tíma. Auk þess hituðum við upp fyrir Prodigy hér heima þannig að þetta var ferðalag sem ég get hiklaust mælt með.“



John Grant tók ástfóstri við Ísland árið 2011 en hefur aldrei komið til Eyja.

MYND/ARNÞÓR

## John Grant kemur til Eyja í fyrsta skipti

John Grant tók tilboði um að spila á Þjóðhátíð fagnandi, enda lítur hann á það sem kærkomið tækifæri til að heimsækja Vestmannaeyjar.

John Grant kemur fram á Þjóðhátíð í fyrsta skipti í ár. Grant stígur á svið klukkan 23.15 laugardaginn 2. ágúst en í kjölfarið hefst hin margrómaða flugeldasýning. Quarashi er svo á dagskrá 00.15

Grant hreifst sem kunnugt er af landi og þjóð við fyrstu komu til landsins á Iceland Airwaves árið 2011. Hann sneri aftur til að taka upp síðari sólóplötu sína, Pale Green Ghost, nokkrum mánuðum síðar og ákvað í kjölfarið að setjast hér að. Hann hefur hins vegar aldrei komið til Vestmannaeyja. Þegar ljóst var að hann myndi spila á Þjóðhátíð sagðist hann líta á það sem frábært tækifæri til að sækja eyjarnar heim.

Grant hefur gaman af ljósmyndun og hefur tekið margar fallegar myndir af því sem fyrir augu hans ber hér á landi. Mörg-

um þeirra deilir hann með aðdáendum sínum á Facebook. Hann hlakkar mikið til að koma til Eyja og ljóst að þar er margt fyrir augað.

Grant upplýsti í viðtali við Fréttablaðið í byrjun júní að hann komi mestmegnis til með að taka lög af Pale Green Ghosts, sem kom út í fyrra, en líka nokkur af fyrstu sólóplötunni Queen of Denmark sem kom út 2010.

Grant var tilnefndur til Britverðlaunanna fyrr á þessu ári sem besti alþjóðlegi tónlistarmaðurinn og skipaði sér þar í flokk með ekki ómerkari mönnum en Justin Timberlake, Eminem, Drake og Bruno Mars, en hinn síðastnefndi hreppti hnossið. Hann var svo valinn söngvari og lagahöfundur ársins á Íslensku tónlistarverðlaununum í mars.

# Nennum ekki að vera einhæfir

Kaleo spilar í fyrsta sinn á Þjóðhátíð í ár. Sveitin skaust upp á stjörnuhimininn fyrir rétt rúmu ári. Hún hefur fangað hug og hjörtu Íslendinga og stefnir nú út fyrir landsteinana. En fyrst er það Þjóðhátíð, og strákarnir hlakka til.

Við sögðum að sjálfsögðu já þegar við vorum spurðir í vetur hvort við vildum spila á Þjóðhátíð. Þetta er algert óskagigg enda mörg þúsund manns á svæðinu,“ segir Jökull Júlíusson, söngvari Kaleo en sveitin spilar á Þjóðhátíð í fyrsta sinn í ár. Sjálfur hefur Jökull aldrei farið á Þjóðhátíð en hefur góða reynslu af Eyjamönnum. „Við höfum verið að spila dálítið í Eyjum að undanförun og það er mikil stemning í Eyjamönnum sjálfum.“

Jökull hlakkar til að upplifa Þjóðhátíð. „Ég er að fá féлага minn frá Danmörku í heimsókn og hann ætlar með, enda er ég búinn að lofa honum miklu fjöri,“ segir Jökull sem gefst þó ekki mikill tími til að anda að sér stemningunni. „Við verðum í Eyjum á föstudagskvöldinu, á Siglufirði á laugardag og á Akureyri á sunnudag.“

### Heimsfrægir í Mosfellsbæ

Frægðarsól Kaleo hefur risið hratt á rúmu ári. „Þetta fór hratt af stað þá og hefur undið upp á sig síðan. Í kjölfarið á Vor í Vaglakógi fór fólk að hlusta á önnur lög eftir okkur, við fengum plötusamning, platan kom út í nóvember og í síðustu viku fengum við afhenta gullplötu,“ segir Jökull og finnur ekkert neikvætt við frægðina. „Enda held ég að við séum nú bara heimsfrægir í Mosfellsbæ og þar þekktum við alla fyrir hvort eð er,“ segir Jökull glaðlega. Hann segir lítið um að hann sé beðinn um einhandararitun á förunum vegi.

Hugur Kaleo-strákanna stefnir þó hátt. Í það minnsta út fyrir landsteinana. „Við förum í lítinn Evróputúr í maí. Þá förum við til Danmerkur, Eistlands og Lettlands. Svo erum við á leiðinni á G! Festival í Færeyjum 19. júlí og líklega förum við til London í haust,“ segir Jökull en sveitinni var einnig boðið að spila í Kanada



Kaleo hlaut gullplötu á dögnum þegar 5.000 eintök höfðu selst af fyrstu plötu hljómsveitarinnar.

um verslunarmannahelgina. „En við vorum spenntari fyrir að spila á Þjóðhátíð.“

### Rokk og ról og ballöður

En hver er draumurinn? „Bara að geta haldið áfram að gefa út tónlist og að næsta plata verði betri en sú síðasta,“ svarar Jökull af sinni alkunnu hógværd.

Kaleo leggur nú grunn að næsta hljómdiski en nýtt lag verð-

ur líklega gefið út í lok júlí. „Platan verður fjölbreytt eins og síðasta plata. Við segjum stundum að við nennum ekki að vera einhæfir enda engin ástæða til, sama hvað tónlistargagnrýndum og fleirum finnst um það.“

En hvað fá gestir Þjóðhátíðar að heyra? „Við ætlum að spila okkar þekktustu lög, kannski í bland við eitthvað nýtt. Við vonum að fólk syngi með og njóti.“


## Skipulag í föstum skorðum

Þrátt fyrir mörg þúsund gesti á hverju ári er skipulag Þjóðhátíðar í nokkuð föstum skorðum þar sem Þjóðhátíðarnefnd og mörg hundruð sjálfbóðaliðar vinna saman að uppsetningu þessarar elstu útihátíðar landsins. Hörður Orri Grettisson, einn nefndarmanna Þjóðhátíðarnefndar, segir undirbúning Þjóðhátíðar hefjast strax eftir verslunarmannahelgi þótt eðlilega gangi mest á síðustu vikurnar fyrir Þjóðhátíð. „Nefndin hittist í byrjun október þar sem línurnar eru lagðar fyrir árið. Á lokametrunum fer allt í gang inni í dal þar sem nokkur hundruð sjálfbóðaliðar hjálpa til við að setja upp svæðið. Þeir hafa allir vel skilgreint hlutverk og því gengur allt eins og vel smurð vél.“

Tugir sjálfbóðaliða frá ÍBV sjá um gæslu en um 100 manns starfa við hana milli kl. 21 til 5 um morguninn. „Á okkar vegum verða við gæslustörf í Herjólfssdal þrír brádataeknar, þrír neyðarflutningamenn

sem hafa til umráða tvo fullbúna sjúkrabíla, fjöldi lögreglumanna, hjúkrunarfræðingar, lækni er á sólahringsvakt í dalnum auk þess sem yfirmaður sálgeslunnar er doktor í sálfræði. Einnig er mjög gott myndavélakerfi með nýju eftirlitsmyndavélum í dalnum til að tryggja sem mest öryggi þjóðhátíðargesta. Auk þess er sjúkrahúsið hér fullmannað þannig að allt í allt er þetta gríðarstór hópur fólks sem kemur að hátíðinni með einum eða öðrum hætti.“

Þótt skipulag hátíðarinnar sé í föstum skorðum tekur hún þó breytingum milli ára að sögn Harðar. „Eyjamönnum þykir auðvitað vænt um Þjóðhátíð og hafa margir sterkar skoðanir á henni. Við í Þjóðhátíðarnefnd þurfum alltaf að takast á við þá áskorun að hlusta á bæjarbúa og halda í gamlar hefðir en um leið að þróa hátíðina til nútímans, eins og við höfum reyndar gert með góðum árangri undanfarin ár að mínu mati.“



„Gríðarstór hópur fólks kemur að hátíðinni með einum eða öðrum hætti,“ segir Hörður Orri Grettisson, einn nefndarmanna í Þjóðhátíðarnefnd.

MYND/ÖR. BINKASAFN



# SLÁÐU Á ÞORSTANN

TAKTU ÞÁTT Í FRÁBÆRUM LEIK  
YFIR 1000 GLÆSILEGIR VINNINGAR Í BOÐI

Nánari upplýsingar á [facebook.com/pepsimax.is](https://facebook.com/pepsimax.is)

LIVE FOR NOW™



# Vil halda í gömlu hefðirnar

Elínborg Jónsdóttir er alin upp í Vestmannaeyjum og hefur sótt Þjóðhátíð frá unga aldri. Hún segist alltaf hlakka til þegar hátíðin nálgast. Margt hefur þó breyst í árunna rás, til dæmis sáu heimamenn sjálfir um öll skemmtiatriðin hér áður fyrr.

Ég er þegar búin að smyrja 50 flatkökur með hangikjöti en þær eru ómissandi á hátíðinni," segir Elínborg Jónsdóttir, húsmóðir í Eyjum. „Ég er að verða 73 ára og hef farið á allar Þjóðhátíðir nema fjórar síðan ég fæddist. Þjóðhátíð hefur verið ríkur þáttur í lífi fjölskyldu minnar. Við erum alltaf með tjald á svæðinu, búið húsgögnum; sófa, borði og stólum. Ég á ekkert nema góðar minningar um Þjóðhátíð," segir Elínborg.

Stórfjölskylda Elínborgar kemur saman í tjaldinu sem heitir Laufás eftir bæ ömmu hennar og afa. „Við flytjum ekki í Dalinn en erum þar alla daga. Á fimmtudeginum er tjaldað, á föstudagsmorgni er síðan farið með allt hafurtaskið, nesti og nýja skó, eins og það er kallað," segir hún. „Setning hátíðarinnar er hálf þrjú og þá mætir maður á svæðið, klæddur eftir veðri en þó alltaf í betri fötum. Mér finnst alltaf mikil stemning á Þjóðhátíð og þetta er stór hluti af menningu okkar Eyjafólks," segir Elínborg ennfremur.

## Margt hefur breyst

Hún segir að hátíðin hafi breyst mikið í árunna rás. „Sumt er betra en annað verra, eins og gengur. Mér finnst vera of mikil drykkja á nóttunni. Ég hef alltaf átt auðvelt með að skemmta mér vel án áfengis. Fólk hefur auðvitað alltaf haft vín um hönd en meira síðustu árin. Á árum áður var umgjörðin meira heimagerð. Núna er meira lagt

í allan undirbúning og frægir listamenn koma fram. Þegar ég var að alast upp var skemmtunin nær eingöngu í höndum heimamanna, til dæmis mikið um einsöng. Það væri varla boðlegt í dag. Þá var einnig meira lagt upp úr íþróttum að deginum. Ég hef engu að síður gaman af að fylgjast með þeim frægu listamönnum sem koma fram.“

## Mikil stemning

Elínborg segir ævinlega hafa verið mikla hátíðarstemningu á Þjóðhátíð. „Mér hefur alltaf þótt langskemmtilegast að deginum þegar húsmæður í tjöldunum bjóða upp á kaffi og fínt meðlæti. Það er stór partur af upprunalegu Þjóðhátíðinni okkar. Mikil gestrisni alls staðar og nægar veitingar. Áður fyrr var boðið upp á reyktan lunda en hann fæst ekki lengur. Það hefur alltaf verið gestkvæmt í tjaldinu okkar, sungið og spilað. Mér líst reyndar vel á Eyjalagið í ár, það er grípandi. Maðurinn minn, sem nú er látinn, Guðjón Pálsson skipstjóri, spilaði alltaf á harmóníku og það bjó til stemningu á svæðinu. Bróðir minn spilaði á gítar og svo sungu allir viðstaddir háum rómi. Það var alltaf mikil tónlist í kringum okkur. Ég er af stórri Vestmannaeyjaætt og það kemur alltaf stór hópur af ættingjum af landi sem leitast uppi Laufástjaldið. Mér finnst svo mikið atriði að halda í gamlar hefðir og fjölskyldustemninguna.“



Í tjaldinu Laufási kemur stórfjölskyldan saman yfir kræsingum.



Þjóðhátíð 1965.



Elínborg Jónsdóttir (til hægri) ásamt Bergljótu Björnsdóttur.

## Gefðu tönnum aukakraft



Nýtt  
tyggigúmmi  
fyrir tennurnar  
- gott að tyggja!

Góð viðbót við  
tannburstun

✓ **Kalk**  
Kalk er nauðsynlegt  
fyrir viðhald tanna

✓ **Flúor**  
Flúor verndar tennur  
fyrir skemmdum

✓ **Xylitol**  
Sykurlaust tyggigúmmi flýtir  
fyrir jafnvægi í gerlaflóru  
munnsins

**mentos**  
PROTEX

# EINFÖLD GÆÐI



**NESCAFÉ**®

# Gæsa húð á sviðinu með Sálinni

Strákarnir í Skítamóral voru ekki nema 15 ára þegar þeir spiluðu fyrst á Þjóðhátíð 1991. Þeir hafa verið fastagestir í Eyjum en um næstu verslunarmannahelgi spila þeir á Þjóðhátíð í sjöunda sinn. Gestir í Eyjum fá gömlu slagarana í æð auk nýs efnis frá sveitinni.

**F**oreldrum okkar leist ekkert á þetta og héldu fund. Þar varð niðurstaðan sú að við fengjum að fara ef við yrðum hjá frænku hans Adda í Eyjum,” segir Jóhann Bachmann, trommari Skítamóral, þegar hann rifjar upp hvernig ung og efnileg sveit fjögurra fimmtán ára stráka frá Selfossi fékk boð um að spila á Þjóðhátíð í fyrsta sinn.

## Ólýsanleg tilfinning

Þótt upplifunin hafi verið einstök fyrir unglingana árið 1991 er það Þjóðhátíðin sex árum síðar sem er Hanna einna minnisstæðust. „Þá vorum við aðalbandið í fyrsta sinn, ásamt Sálinni. Það var hreint ótrúleg upplifun. Þessar hljómsveitir skiptu öllum kvöldunum á milli sín en síðasta kvöldið vorum við saman uppi á sviði með Sálinni og það var ólýsanleg tilfinning,” lýsir hann „Maður var með gæsa húð allan tímann.“

## Allir glaðir í dalnum

EKKI gafst mikill tími til skemmtanahalds fyrir sveitina það árið enda taka tónleikar hvert kvöld mikla orku.

„Í ár spilum við bara á laugardagskvöldið, fyrst á kvöldvökunni og svo á ballinu. Þeir sem það vilja ættu því að geta skemmt sér eftir

það,” segir Hanni sem sjálfur er fæddur í Vestmannaeyjum og hefur því sótt ófáar Þjóðhátíðir frá barnsaldri.

Inntur eftir því hvað það sé við Þjóðhátíð sem dragi allt þetta fólk að segist Hanni halda að það sé gleðin, kætin og hamingjan. „Það er eitthvað sem gerist í dalnum sem gerir alla glaða.“

## Gamlir slagarar og nýir

Hanni segir gesti Þjóðhátíðar mega búast við að heyra gömul og góð Skítamóralslög á borð við Farinn og Ennþá. „Svo spilum við líka nýja lagið okkar, Þú (ert ein af þeim). Við höfum í gegnum tíðina reynt að taka coverlög á böllum en fólk vill það ekkert. Það vill bara heyra okkar lög. Þess vegna höldum við okkur við það,” segir Hanni en honum finnst sjálfum mesta fjörið að spila Ennþá og Æði á böllum. „Þá verður allt vitlaust.“

Auk þessa verða eyjalög Skítamóral örugglega á dagskrá en það eru Þú veist hvað ég meina mær frá 1997 og Draumur um Þjóðhátíð frá 2003.

## Nýtt lag og mikið um að vera

Skítamóral hefur annars margt á þróunum. „Það kemur nýtt lag frá okkur í haust og svo



Það er alltaf mikið fjör þegar strákarnir í Skítamóral koma saman.

MYND/GASSI

erum við að spila á fullu og þegar búíð að bóka verkefni í vetur.“

Félagarnir í Skítamóral eru sex. Það eru Hanni, Addi, Gunni Óla og Herbert sem skipuðu upphaflega bandið en auk þess eru með þeim þeir Einar Ágúst og Gunnar Þór. „Einar

tók sér frí í tíu ár en er nú kominn aftur. Það er mjög gaman að vera komnir saman að nýju. Það gerist eitthvað ákveðið þegar við erum komnir allir saman upp á svið. Við dettum í einhvern svakalegan gír og gleðin og stemningin á sviðinu verður mikil,” segir Hanni.



Meðal þeirra sem bjóða upp á bátsferðir frá Eyjum er ribsafari.is.

## Afbreyting í Eyjum

Þótt flestir mæti á Þjóðhátíð til að taka þátt í hátíðahöldunum í Herjólfssdal er ýmislegt annað hægt að gera í eyjunum.

### Golf

Eyjamenn eiga glæsilegan golfvöll sem er einn besti 18 holu völlum landsins og einn af 200 bestu völlum Evrópu.

### Fuglalíf og klettafjör

Í Vestmannaeyjum er líf í björgunum en vel þekkt er sú iðja Eyjamanna að spranga í klettunum. Þetta finnst bæði börnum og fullorðnum skemmtilegt. Best er að fara varlega því slysin gera ekki boð á undan sér.

Ferðamenn geta einnig gengið á fjöll. Til dæmis má nefna tindana sjö sem umkringja byggðina. Þar er gengið um söguslóðir og misbrattar hlíðar. Klettarnir iða af fuglalífi og Vestmanneyjar eru sannkölluð paradís fuglaskoðarans.

### Höfin blá

Ýmsir aðilar bjóða upp á bátsferðir af ýmsum toga frá Vestmannaeyjum. Til dæmis Viking tours sem sigla kringum eyjuna, fara í hvalaskoðunarferðir, sjóstangveiðiferðir og skoðunarferð til Surtseyjar.

Ribsafari býður einnig upp á spennandi afbreytingu. Siglingu í harðbotna slöngubátum, lundaskoðun, ýmsar sérferðir og annað skemmtilegt.

### Söfn

Í Eyjum eru nokkur söfn, þar á meðal Náttúrugripasafnið, Bygðasafnið og Surtseyjarstofa.

Eldheimar er glænýtt og spennandi safn sem miðlar fróðleik um eldgosid í Eyjum 1973.

# Tók þessari áskorun fagnandi

Jón Ragnar Jónsson er höfundur Þjóðhátíðarlagsins í ár. Lagið þykir einstaklega grípandi og Jón hefur fengið mjög góð viðbrögð við því.

**Þ**egar Jón var beðinn um að semja Þjóðhátíðarlagið fyrir árið 2014 síðastliðið haust var það auðsótt af hans hálfu. „Ég þurfti ekki að hugsa mig tvisvar um. Þarna var gamall draumur að rætast. Ég hef oft farið á Þjóðhátíð og upplifað stemninguna. Ég tók þessari áskorun því fagnandi,” sagði Jón þegar blaðamaður náði tali af honum í Hvítarússlandi þar sem hann var á ferð með knattspyrnumönnum FH vegna Evrópuleiks.

Jón segist hafa farið fyrst á Þjóðhátíð árið 2003 og nokkrum sinnum síðan. Bæði 2011 og 2012 kom hann fram á hátíðinni. „Ég þekki algjörlega stemninguna og þegar kom að því að semja texta var ég ekkert að finna upp hjólið. Frekar að setja á blað hina týpisku stemningu sem allir þekkja sem hafa verið á Þjóðhátíð. Síðan þurfti ég að huga að því að lag og texti væru þannig að allir gætu sungið með,” segir Jón sem hefur fengið mjög góð viðbrögð við laginu, jafnt frá Eyjamönnum sem öðrum.

Á föstudagskvöldið á Þjóðhátíð kemur Jón fram og frumflytur lagið fyrir gesti ásamt hljómsveit sinni. „Hljómsveitin klæðir lagið í fullan skrud. Það væri ekkert varið í þetta ef ég væri einn með kassagítarinn. Ég er farinn að hlakka mikið til, enda veit ég að þetta verður sérstök stemning.“

### Ljúft að vera til

Í Herjólfssdalnum, við lífsins njótum. Það er svo ljúft að vera til. Vináttuörvum allt í kring skjótum. Samveran veitir birtu og yl.

Hér er hamingja, ást og gleði. Stemmingin í dalnum er svo blíð. Forréttindi að vera með í, veisluhöldunum á Þjóðhátíð.

Eyja meyja og peyja, lof mér að segja, ó, hve ljúft það er að vera til. Eyja meyja og peyja, lof mér að segja, ó, hve ljúft það er að vera til.

Í bleikri brekkunni við syngjum saman. Svo ljúft að vera þér við hlið.

Í þínum örmum svo hlýtt, svo gaman. Vor bjarta framtíð blasir við.

Hér er hamingja, ást og gleði. Stemmingin í dalnum er svo blíð. Forréttindi að vera með í, veisluhöldunum á Þjóðhátíð.

Eyja meyja og peyja, lof mér að segja, ó, hve ljúft það er að vera til.

Eyja meyja og peyja, lof mér að segja, ó, hve ljúft það er að vera til.

Jón Ragnar Jónsson hlakkar til að frumflytja lagið sitt á Þjóðhátíðinni í Eyjum.



TIL HÁMINGJU  
MEÐ 140 ÁRÁ  
AFMÆLIÐ,  
ÞJÓÐHÁTÍÐ



TAKK FYRIR  
SAMSTARFIÐ

LÉTTÖL



VIÐ HLÖKKUM TIL AÐ FAGNA  
Í STÆRSTU OG FLOTTUSTU  
AFMÆLISVEISLU SEM UM GETUR

## LAUGARDAGSPASSINN

Af hverju ekki að fara í dagsferð til Eyja á Þjóðhátíð og upplifa magnaðan laugardag sem endar með ofurtónleikum Quarashi? Engin gisting og ekkert vesen!

Í ár mun Þjóðhátíðarnefnd bjóða upp á laugardagsferð og laugardagspassa á Þjóðhátíð.

Pakkinn mun kosta einungis 14.420 kr. á mann og verður einungis takmarkað magn miða í boði.

Í pakkanum er innifalinn laugardagspassi í Herjólfssdal, 11.900 kr. og tvær ferðir með Herjólfí á 1.260 kr. hvor ferð. Einnig verður hægt að kaupa laugardagspassann eingöngu.

Dagskráin á laugardagskvöldinu er ekki af verri

endanum: Kvöldvaka, Skonrokk, Skítamórall, Mammút, Jónas Sigurðsson, John Grant, flugeldasýning og Quarashi

Hægt er að leggja af stað frá Landeyjahöfn með Herjólfí á laugardeginum kl. 13, 16 og 19. Brottför frá Eyjum er aðfarnótt sunnudags kl. 4, 6 og 8.30. Takmarkað sætaframboð er í Herjólf þessar ferðir – því skiptir máli að vera snemma á ferðinni til að tryggja sér miða! Kaupu miða á dalurinn.is Verð:

14.420 kr. aðgangsmiði með Herjólfí

11.900 kr. aðgangsmiði

1.260 kr. Ferðin með Herjólfí



## SUNNUDAGSPASSINN

**Brekkusöngurinn** er einn af hápunktum Þjóðhátíðar. Þeir sem ekki treysta sér til þess að vera alla hátíðina en vilja samt taka þátt í brekkusöngnum geta keypt svokallaðan sunnudagspassa.

**Dagskráin um** kvöldið er svo ekki af verri endanum. Klukkan 21 stíga á svið Fjallabræður ásamt Lúðrasveit Vestmannaeyja og gestum, Jónasi Sigurðssyni, Sverri Bergmann og Helga Björns. Klukkan 23.15 er brekkusöngur og á miðnætti er kveikt á blysum í brekkunni ofan við dalinn. Fyrir dansi eftir miðnætti spila Retro Stefson og Sálín.

**Nánari upplýsingar** um passana er að finna á síðunni [www.dalurinn.is](http://www.dalurinn.is)



## BRENNAN Á FJÓSAKLETTI

Einn af hápunktum Þjóðhátíðar í Vestmannaeyjum er brennan á Fjósakletti á föstudagskvöldinu. Þjóðhátíð er nú haldin í 140. skiptið en elstu heimildir um brennuna eru frá árinu 1929. Á hverju ári er hefðbundnum trébrettum staflað hverju ofan á annað, samtals 55 brettahæðir, sem mynda um átta metra háan turn á Fjósaklettinum í Herjólfssdal. Fyrr í vikunni eru brettin vírbundin svo þau hrynji ekki og á föstudeginum sjálfum eru þau olíuborin svo þau séu tilbúin fyrir brunann. Um kvöldið eru neðstu brettin bleytt aftur og á miðnætti er eldur borinn að brettastaflanum. Það er sérstakur brennukóngur sem hleypur upp brekkuna með kyndil og tendrar brennuna við mikinn fögnuð þjóðhátíðargesta. Til að halda lífi sem lengst í eldinum sjá svokallaðir „skvettarar“ um að skvetta olíu á brennuna þannig að eldurinn nái að lýsa upp dalinn sem lengst. Yfirleitt logar enn í brennunni snemma morguns þegar formlegri dagskrá lýkur. Brettunum, sem notuð eru, er safnað saman allt árið og koma þau meðal annars frá fyrir-tækjum bæjarins. Í falllegu veðri þykir brennan ein sú fegursta, er ekki sú fegursta, sem tendruð er hélendis.

DAGSKRÁ  
ÞJÓÐHÁTÍÐAR 2014

## FÖSTUDAGUR

## 14:30 Setning Þjóðhátíðar

Þjóðhátíð sett: Sigursveinn Þórðarson  
Hátíðarræða: Martin Eyjólfsson  
Hugvekja: Séra Guðmundur Örn Jónsson  
Kór Landakirkju  
Lúðrasveit Vestmannaeyja  
Bjargsig: Bjartur Týr Ólafsson

15:00 Barnadagskrá á Tjarnarsviði  
Frjálsar íþróttir, Ungmennafélagið Óðinn  
Fimleikafélagið Rán  
Brúðubíllinn  
Barnaball með Páli Óskari, Páll Óskar  
gefur eiginhandaáritanir eftir ball

## KVÖLDVAKA

20:30 Frumflutningur Þjóðhátíðarlags, Jón Jónsson  
21:15 100 ára afmæli Ása í Bæ  
21:45 Kaleo  
22:30 Baggalútur  
23:15 Páll Óskar

## 00:00 Brenna á Fjósakletti

## 00:15 Skálmöld

## Dansleikir á báðum pöllum

Brekkusvið: **Friðrik Dór – MC Gauti – Páll Óskar**

Tjarnarsvið: **Dans á rósum og The Backstabbing Beatles**

## LAUGARDAGUR

10:00 Létt lög í dalnum  
15:00 Barnadagskrá á Brekku- og Tjarnarsviði  
Brúðubíllinn  
Latibær  
The Mighty Gareth  
15:30 Hoppukastalar  
15:30 Alltaf Gaman – Leikjaland með ýmsum leikjum fyrir alla fjölskylduna  
16:30 Söngvakeppni barna, Dans á rósum  
Kassabílarall – hefst eftir að söngvakeppni barna líkur

## KVÖLDVAKA

20:30 Skonrokk  
21:05 Skítamórall  
21:40 Mammút  
22:20 Jónas Sigurðsson og ritvélar framtíðarinnar  
23:00 The Mighty Gareth  
23:15 John Grant

## 00:00 Flugeldasýning

## 00:15 Quarashi

## Dansleikir á báðum pöllum

Brekkusvið: **Skonrokk - Skítamórall**

Tjarnarsvið: **Brimnes**

## SUNNUDAGUR

10:00 Létt lög í dalnum  
15:00 Barnadagskrá á Brekku- og Tjarnarsviði  
Latibær  
The Mighty Gareth  
Söngvakeppni barna, Dans á rósum  
15:30 Hoppukastalar  
15:30 Alltaf Gaman – Leikjaland með ýmsum leikjum fyrir alla fjölskylduna

## KVÖLDVAKA

20:30 Dans á Rósum  
21:00 Sigurvegarar úr söngvakeppni barna  
21:00 Fjallabræður ásamt Lúðrasveit Vestmannaeyja og gestum  
Jónas Sigurðsson  
Sverrir Bergmann  
Helgi Björns

## 23:15 Brekkusöngur

## 00:00 Blys

## Dansleikir á báðum pöllum

Brekkusvið: **Retro Stefson – Sálín**

Tjarnarsvið: **Dans á rósum, Brimnes**

\*Dagskrá Þjóðhátíðar 2014 er birt með fyrirvara um breytingar

